

Ukioq 2025-imiit nutaamik umiarsuarmik sinersortaateqalernissaa siunertaralugu Naalakkersuisut pilersaarummik suliaqarnissaannik Inatsisartut aalajangiiffigisassaattut siunnersuut, taamaasilluni pilersaarut kingusinnerpaamik UKA 2023-imi saqqummiunneqassaaq.

(Ineqarnermut Attaveqaasersuutinullu Naalakkersuisoq)

Akissuteqaat

(Ineqarnermut Attaveqaasersuutinullu Naalakkersuisoq)

Siullermeerneqarnera

Naalakkersuisut sinnerlugit Anders Olsen, Siumut aalajangiiffigisassatut siunnersuutaanut qujarusuppugut.

Nunarput kusanartoq innuttaasut sinersorfigalugu angallaviginissaanut pitsanngorsaaviginissaat, siumullu isigisumik aalajangiiffigisassatut siunnersuusiortumut matumunnga, manna iluatsillugu Naalakkersuisut aallarniutigalugu qujarusupput.

1990-ikkut naaneranni sinerissami mittarfiit arlallit pilersiortorneqarput. Tamatumallu kingorna 2000-ikkut qiteqqunneranni politikikkut aaliangiunneqarpoq marloqiusamik, tassa silaannakkut aammalu imaatigut angallassineq allanngortinneqassasoq, taamaasilluni silaannakkut angallassineq taamaallaat ingerlanneqalissasoq. Taamaaliornikkut aningaasat 95 mio. missaat ilinniartitaanermut tunngasunut nuunneqarnerat aaliangiunneqarluni. Tassa siusinnerusukkut sinersortaatit allaat pingasuusimagaluartut maanna ataasiinnanngortinneqarnerannik malitseqarsimasoq aammalu illoqarfiit arlallit sinersortaammik tikinneqartarnerat allanngortinneqarsimalluni.

Tamatumap malitsigisaanik ullumikkut sinerissami illoqarfiit arlallit umiarsuarmik sinersortaammik tikinneqarusullutik kissaateqartarnerat aammalu innuttaasut atsiortitsinermikkut kissaateqartarnerat naammassiniarlugu politikikkut pingaarutilimmik suliaasaqarpugut.

Ullumikkut sinersortaatit atorneqartoq Sarfaq Ittuk atorneqartup akuersissuteqarfigineqarnerata killinga tikikkiartorneqarpoq.

Taamaattumik siunissami ilaasunik imaatigut angallassinissamut siumut ilisimanninnissamut qulakkeerinnittussamik pilersaaruteqarnissaanut, Naalakkersuisut siunnersuuteqartumut isumaqataapput.

Imaatigut kiffartuussinissamik isumaqatigiissutinik suliaqartut peqatigalugit, siunissami ilaasunik angallassinermi atugassarititaasussat pitsanngorsaaviginissaat siunertaralugu Naalakkersuisut suliaqarput.

Taamaattumik 2025i tikitsinnagu pilersaarutit piareersimanissaat pingaaruteqarmat ilaasunik angallassinissaq pillugu pilersaarusiortoqarnissaa piaarnerpaamik sulissutigissavara. Ukiullu aallartisimalaarnerani angallassisut aammalu kommuunit, inuussutissarsiortut allallu suleqatigalugit isumasioqatigiittoqarnissaanik suliamik ingerlatsilluta.

Ilaasunik angallassinernerup sunniuteqarluarnissaanik siunertaqarluni pilersaarummik suliaqassallutik Naalakkersuisut kissaatigaat, taamaattumillu aaqqiissutissaq sorleq toqqarneqassanersoq maannangaaq aalajangerneqarnikuunani. Susasaqartulli arlallit akuutinneqarnissaat Naalakkersuisut pingaartippaat. Aaqqiissutissamik sapinngissamik pitsaanerpaamik nassaarnissaq pingaarnerpaavoq. Akuutinneqartut piffissami eqqortumi akuusitinnerisigut aaqqiissutissaq pitsaanerpaaq nassaarineqarsinnaasoq Naalakkersuisut uppeeraat.

Tamanna tunuliaqutaralugu Naalakkersuisut allannguutissatut siunnersuummik imaattumik saqqummiusserusupput:

”2025 nallertinnagu ilaasunik angallassinissaq pillugu Naalakkersuisut pilersaarusiortoqarnissaannik Inatsisartut aalajangiiffigisassaattut siunnersuut. Angallasseriaatsimut tamakkiisumut atatillugu periarfissani assigiinngitsuni missingersuutit aningaasaqarnikkullu kinguneqaataasussat pilersaarummi nassuiaatigineqassapput, inoqarfiillu amerlanerit tikiinneqarsinnaanissaat ilanngullugu suliaqartoqarsimanissaa t ilanngunneqassalluni. Pilersaarut kingusinnerpaamik UKA2023-mi Inatsisartunut saqqummiunneqassaaq.”

Taamatut oqaaseqarlunga suliassat Inatsisartuni kajumittumik suliassanngorpara.